


全五代詩

附補遺

一五





全五代詩

附補遺

(五十)

李調元編

編主五雲王

編初成集書叢

全 五 代 詩  
附 補 遺  
十 五 冊

中華民國二十六年六月初版

編者

李

調

元

發行人

王

雲

五

上海河南路

印刷所

商

務

印書館

上海河南路

發行所

商

務

印書館

上海及各埠



叢書集成

初編

主編者  
王雲五

商務印書館發行

# 全五代詩卷九十五

## 荆南

齊 己七

### 遊三覺山

白石路重重。縈紆勢忽窮。孤峰擎像閣。萬木蔽星空。世論隨時變。禪懷歷劫同。良宵正冥目。海日上窗紅。

### 庭際晚菊上主人

九月將欲盡。幽叢始綻芳。都緣含正氣。不是背重陽。採去蜂聲遠。尋來蝶路長。王孫歸未晚。猶得泛金觴。

### 送趙長史歸閩川

荆門與閩越。關戍隔三千。風雪揚帆去。臺隍指海邊。容情消旅火。王化似堯年。莫失春迴約。江城穀雨前。

### 擬嵇康絕交寄湘中貫微

何處同嵇懶。吾徒道異諸。本無文字學。何有往來書。嶽寺逍遙夢。侯門勉強居。相知在元契。莫訝八行疎。

### 寄許州清古

北來儒士說。許下有吟僧。白日身長倚。清秋塔上層。言雖依景得。理要入無徵。敢望多相示。孱微老不勝。

### 謝丁秀才見示賦卷

五首新裁翦。搜羅盡指歸。誰曾師古律。君自負天機。聖后求賢久。明公得雋稀。乘秋好攜去。直望九霄飛。

驚秋

寒裳聽秋信。晚傍竹聲歸。多故堪傷骨。孤峰尙拂衣。梧桐凋綠盡。菡萏墮紅稀。卻恐吾形體。嫌心與口違。

夏日雨中寄幕中知己

北風吹夏雨。和竹亞南軒。豆枕欹涼冷。蓮峰入夢魂。窗多斜迸溼。庭徧瀑流痕。清興知無限。晴來示一言。

夜次湘陰

風濤出洞庭。帆影入從清。何處驚鴻起。孤舟趁月行。時難多戰地。野闊絕春耕。骨肉知存否。林園近郡城。

寄唐稟正字

疎野還如舊。何曾稱在城。水邊無伴立。天際有山城。落日雲霞赤。高窗筆硯明。鮑昭多所得。時憶寄湯生。

宿舒湖希上人房

入寺先來此。經窗半在湖。秋風新菡萏。暮雨老菰蒲。任聽浮生速。能消默坐無。語來燈焰短。嘒唳發高梧。

戊辰歲江南感懷

忽忽動中私。人間何所之。老過離亂世。生在太平時。桃李春無主。杉松寺有期。曾吟子山賦。何啻舊凌遲。

送林上人歸永嘉舊居

東越常懸思。山門在永嘉。秋光浮楚水。帆影背長沙。城黑天台雨。村明海嶠霞。時尋謝公跡。春草有瑤花。

答友生山居寄示

嘉遁有新吟。因僧寄竹林。靜思來鳥外。閑味遶松陰。兵寇憑陵甚。溪山幾許深。休爲反招隱。攜取一相尋。

新秋霽後晚眺懷先公

雨霽湘楚晚。水涼天亦澄。山中應解夏。渡口有行僧。鳥列滄洲隊。雲排碧落層。孤峰磬聲絕。一點石龕燈。

池上感興

所向似無端。風前吟凭欄。旁人應悶見。片水自閑看。碧底紅鱗鬣。澄邊白羽翰。南山衆木葉。飄著竹聲乾。

和曇域上人寄贈之什

百病煎衰朽。栖遲戰國中。思量青壁寺。行坐赤松風。道寄虛無合。書傳往復空。可憐禪月子。香火國門東。

弔雙泉大師真塔

塔聳層峰後。碑鐫巨石新。不知將一句。分付與何人。靜坐雲生衲。空山月照真。後徒遊禮者。猶認指迷津。

暮冬送璘上人歸華容

故園雖不遠。那免愴行思。莽蒼平湖路。霏微過雪時。全無山阻隔。或有客相隨。得見交親後。春風動柳絲。

謝人惠丹藥

別後聞餐餌。相逢訝道情。肌膚紅色透。髭髮黑光生。仙洞誰傳與。松房自鍊成。常蒙分遠惠。亦覺骨毛輕。

荆門病中寄懷貫微上人

我衰君亦老。相憶更何言。除泥安禪力。難醫必死根。梅寒爭雪彩。日冷讓冰痕。早晚東歸去。同尋入石門。

答孔秀才

早向文章裏。能降少壯心。不愁人不愛。閑處自閑吟。水國雲雷闊。僧園竹樹深。無嫌我衰颯。時此一相尋。

秋江

兩岸山青映。中流一櫂聲。遠無風浪動。正向夕陽橫。島嶼蟬分宿。沙洲客獨行。浩然心自合。何必濯吾纓。

船窗

孤舸凭幽窗。清波逼面涼。舉頭還有礙。低眼卽無妨。瞥過沙禽翠。斜分夕照光。何時到山寺。上閣看江鄉。

永夜

永日還欹枕。良宵亦曲肱。神閑無萬慮。壁冷有殘燈。香影浮龕象。瓶聲著井冰。尋思到何處。海上斷崖僧。

自遣

了然知是夢。旣覺更何求。死入孤峰去。灰飛一燼休。雲無立碧在。天靜月華流。免有諸徒弟。時來弔石頭。

送陳霸歸閩

涼風動行興。含笑話臨途。已得身名了。全忘客道孤。鄉程過百越。帆影遶重湖。家在飛鴻外。音書可寄無。

寄孫闢呈鄭谷郎中

衝岳去都忘。清玲戀省郎。淹留才半月。酬唱頗盈箱。雪長松檉格。茶添語話香。因論樂安子。年少老篇章。



荆門送人自峨嵋游南岳

峨嵋來已遠。衡岳去猶賒。南浦懸帆影。西風亂荻花。天涯遙夢澤。山衆近長沙。有興多新作。攜將大府誇。

謝主人石筍

西園罷宴遊。束閣念林邱。特減花邊峭。來添竹裏幽。憶過陽朔見。曾記大湖求。從此頻吟遶。歸山意亦休。

秋夕寄諸姪

每到秋殘夜。燈前憶故鄉。園林紅橘柚。窗戶碧瀟湘。離別身垂老。艱難路去長。弟兄應健在。兵火裏耕桑。

謝炭

正擁寒灰次。何當惠寂寥。且留連夜向。未敢滿爐燒。必恐吞難盡。唯愁撥易消。豪家捏爲獸。紅迸錦茵焦。

夏滿日偶作寄孫支使其年閏五月

一百二十日。煎熬幾不勝。憶歸滄海寺。冷倚翠崖稜。舊扇猶操執。新秋更鬱蒸。何當見涼月。擁衲訪詩朋。

寄清溪道友

山門搖落空。霜霰滿杉松。明月行禪處。青苔遶石重。泉聲喧萬壑。鐘韻遍千峰。終去焚香老。同師大士蹤。

謝重緣舊山水障子

敢望重緣飾。微茫洞壑春。坐看終未是。歸臥始應真。已覺心中朽。猶憐四面新。不因公子鑒。零落幾成塵。

寺居

鄰井雙梧上。一蟬鳴隔牆。依稀舊林日。撩亂遶山堂。難嘿吟風口。終清飲露腸。老僧加護物。應任噪殘陽。

剃髮

金刀閃冷光。一剃一清涼。未免隨朝夕。依前長雪霜。夏林欹石膩。春澗水泉香。向老凋疎盡。寒天不出房。

謝高輦先輩寄新唱和集

敢謂神仙手。多懷老比壘。編聯來鹿野。酬唱在龍樓。洛浦精靈懼。邛山鬼魅愁。二南風雅道。從此化東周。

送徐秀才遊吳國

西江東注急。孤櫂若流星。風浪相隨白。雲中獨遇青。他時誰共說。此路我曾經。好向吳朝看。衣冠盡漢庭。

留題仰山大師塔院

嵐光疊杳冥。曉翠溼窗明。欲起遊方去。重來繞塔行。亂雲開鳥道。羣木發秋聲。曾約諸徒弟。香燈盡此生。

蝴蝶

何處皆繁紅。迷芳到檻重。分飛還獨出。成隊偶相逢。遠害終防雀。爭先不避蜂。桃蹊牽往復。蘭徑引相從。翠裊丹心冷。香凝粉翅濃。可尋穿樹影。難覓宿花蹤。日晚來仍急。春殘舞未慵。西風舊池館。猶得採芙蓉。

楊花

暖景照悠悠。遮空勢漸稠。下如飛雪遠。未似落花休。萬帶都門外。千株渭水頭。紛紜知近夏。銷歇恐成秋。軟著朝簪去。狂隨別騎遊。旆衝離館驛。鶯撲繞宮樓。江國晴愁對。池塘晚見浮。虛窗縈夢雅。深院藉苔幽。

靜墮王孫酒。繁粘客子裘。詠吟何潔白。根本屬風流。向日還輕舉。因風更自由。不堪思汁崖。千里到揚州。

夏雨

霽霽蔽穹蒼。冥濛自一方。當時消酷毒。隨處有清涼。著物聲雖暴。滋農潤卽長。乍紅縈急電。微白露殘陽。應禱尤難得。經旬甚不妨。吟聽喧竹樹。立見漲池塘。衆類聲休出。羣峰色盡藏。頽沓來洞壑。汗漫入瀟湘。下叶黎毗望。高祛早曠光。幽齋飄臥簟。極浦灑歸檣。薜在花從溼。花衰苑任傷。悶思濟時力。歌詠發哀腸。

禪庭蘆竹十二韻呈鄭谷郎中

錯錯在禪庭。高宜與竹名。健添秋雨響。乾助夜風清。雀靜知枯折。僧閑見笋生。對吟殊灑落。負氣甚孤貞。密謝編欄固。齊由灌溉平。松姿真可敵。柳態薄難并。映帶兼苔石。參差近畫楹。雪霜消後色。蟲鳥默時聲。遠憶瀟湘岸。寒連暮角城。幽根狂亂迸。勁葉動相撐。避暑須臨坐。逃眠必遶行。未逢仙手詠。俗眼見猶輕。

荆渚病中因思匡廬遂成三百字寄梁先輩

生老病死者。早聞天竺書。相隨幾汨沒。不了堪欷歔。自理自可適。他人誰與祛。應當入寂滅。乃得長銷除。前月已骨立。今朝還貌舒。披衣試步履。倚策聊躊躇。江月青眸冷。秋風白髮疎。新題憶剡硯。舊約懷匡廬。張野久絕跡。樂天曾卜居。空龕掩薜荔。瀑布欹蟾蜍。古檜鳴元鶴。涼泉躍錦魚。狂吟樹蔭映。縱踏花蔞菸。脣舌旣已閉。心脾亦散據。松窗有偃息。石徑無趨趨。夢冷通仙闕。神融合太虛。千峰杳靄際。萬壑明清初。長往期非晚。半生閑有餘。依劉本是詠。訪戴寧忘諸。稽古堪求己。觀時好笑渠。埋頭逐小利。沒腳拖長裾。

道種將閑養。情田把藥鉏。幽香發蘭蕙。穢莽摧邱墟。敢謂囊盈物。那言庾滿儲。微烟動晨爨。細雨滋園蔬。蘇亂珍禽羽。門稀長者車。冥機坐兀兀。著履行徐徐。每訐親朱履。多憐奉隼旟。簪嫌紅玳瑁。社念金芙蓉。海內競鐵馬。篋中藏紙驢。常言謝時去。此意將何如。

題鶴鳴泉八韻

嘹唳遺蹤去。澄明物掩難。噴開山面碧。飛落寺門寒。汲引隨瓶滿。分流逐處安。幽蟲乘葉過。渴犴擁條看。上有危峰疊。旁宜怪石盤。冷吞雙樹影。甘潤百毛端。異早聞鑄玉。靈終別建壇。瀟湘在何處。終日自波瀾。

酬元員外見寄八韻

舊隱夢牽仍。歸心只似蒸。遠青憐島峭。輕白愛雲騰。豔冶叢翻蝶。腥膻地聚蠅。雨聲連灑竹。詩興繼填膺。訪戴情彌切。依劉力不勝。衆人忘苦苦。獨自媿兢兢。處世無他望。流年有病僧。時慙大雅客。遺韻許相承。

瀟湘二十韻

二水遠難論。從離向坎奔。冷穿千嶂脈。清過幾州門。闊去都凝白。傍來盡帶渾。經游聞舜禹。表裏見乾坤。浦靜魚閑釣。灣涼雁自屯。月來分夜底。雲度見秋痕。暮氣藏鄰寺。寒濤聒近村。離騷傳永恨。鼓瑟奏遺魂。霧擁魚龍窟。槎欹島嶼根。秋風帆上下。落日樹沈昏。柳少沙洲缺。苔多古岸存。禽巢依橘柚。獺逕入蘭蓀。色自江南絕。名聞海內尊。吳頭雄莫謁。漢口壯堪吞。廖次晴方映。馮夷信忽翻。渡遙峰翠疊。汀小荻花繁。勢接湖煙漲。聲連瘴雨歆。急搖吟客舫。狂濺野人樽。疏鑿誰窮本。澄鮮自有源。對茲傷九曲。含濁出崑崙。

咽咽復啾啾。多來自早秋。園林涼正好。風雨思相收。在處聲無別。何人淚欲流。冷憐天露滴。傷共野禽遊。靜息深依竹。驚移瞥過樓。分明晴渡口。淒切暮關頭。時節推應足。飛鳴卽未休。年年聞爾苦。遠憶所居幽。

赴鄭谷郎中招遊龍興觀讀題詩板謁七真儀像因有十八韻

何處陪遊勝。龍興古觀時。詩懸大雅作。殿禮七真儀。遠繼周南美。彌旌拱北思。雄方垂朴略。後輩仰箴規。對坐茵花暖。偕行薜陣隳。僧條初學結。朝服久慵披。到處琴碁傍。登樓筆硯隨。論禪忘視聽。譚老極希夷。照日江光遠。遮軒檜影欹。觸鞋松子響。窺立鶴雛癡。始貴茶巡爽。終憐酒散遲。放懷還把握。憩石或搯頤。眺遠凝清眇。吟高動白髭。風鵬心不小。蒿雀志徒卑。顧我專無作。於身忘有爲。叨因五字解。每忝重言期。捨此應休也。何人更賞之。淹留仙境晚。迴騎雪風吹。

假山并序

假山者。蓋懷匡廬有作也。往歲嘗居東郭。因夢覺遂圖於壁。迄今十秋。而攢青疊碧於寤寐間。宛若捫蘿挽樹。而昇彼絕頂。令所作倣像一面。故不盡萬壑千崖。神仙鬼怪之宅。聊得解懷。旣而功就。乃激幽抱。而作是詩。終於一百八十言爾。

匡廬久別離。積翠杳天涯。靜室曾圖峭。幽亭復創奇。曲衣酬土價。擇日運工時。信手成重疊。隨心作蔽虧。根盤驚院窄。頂聳訝簷卑。鎮地那言重。當軒未厭危。巨靈何忍擘。秦政肯輕移。晚覺莎烟觸。寒聞竹籟吹。

藍灰澄古色。泥水合凝滋。引看僧來數。牽吟客散遲。九華渾髣髴。五老頗參差。蛛網藤蘿挂。春霖瀑布垂。加添雙石笋。映帶小蓮池。舊說雷居士。曾聞遠大師。紅霞中結社。白壁上題詩。顧此誠徒爾。勞心是妄爲。經營慙培塿。賞翫愧童兒。會入千峰去。聞蹤任屬誰。

詠茶十二韻

百草讓爲靈。功先百草成。甘傳天下口。貴向火前名。出處春無雁。收時谷有鶯。封題從澤國。貢獻入秦京。鯁覺精新極。嘗知骨自輕。研通天柱響。摘遶蜀山明。賦客秋吟起。禪師晝臥驚。角開香滿室。爐動綠凝鐙。晚憶涼泉對。閑思異果平。松黃乾旋泛。雲母滑隨傾。頗貴高人寄。尤宜別置陳。曾尋修事法。妙盡陸先生。

# 全五代詩卷九十六

## 荆南

齊 己八

### 題南岳般若寺

諸峰翠少中峰翠。五寺名高此寺名。石路險盤嵐靄滑。僧窗高倚泐廖明。凌空殿閣由天設。遍地杉松是  
自生。更有上方難上處。紫苔紅蘚遶崢嶸。

### 題東林十八賢真堂

白藕花前舊影堂。劉雷風骨畫龍章。共輕天子諸侯貴。同愛吾師一法長。陶令醉多招不得。謝公心亂入  
無方。何人到此思高躅。嵐點苔痕滿粉牆。

謝靈運欲入社遠大  
師以其心亂不納

### 寄廬岳僧

一聞飛錫別區中。深入西南瀑布峰。天際雪堆千片石。洞門冰折幾株松。烟霞明媚棲心地。苔蘚縈紆出  
世蹤。莫問江邊舊居寺。火燒兵劫斷秋鐘。

### 遊谷山寺

城裏尋常見碧稜。水邊朝暮送歸僧。數峰雲腳垂平地。一徑松聲徹上層。寒澗不生浮世物。陰崖猶積去年冰。此身有底難拋事。時復攜筇信步登。

楚寺寒夜作

寒爐局促坐成勞。暗淡燈光照二毛。水寺閑來僧寂寂。雪風吹去雁嗷嗷。江山積疊歸程遠。魂夢牽沿過處高。畢竟忘言是吾道。袈裟不稱揖蕭曹。

送泰禪師歸南岳

石龕閑鎖白猿邊。歸去程途半在船。林簇曉霜離水寺。路穿新野入山泉。已尋嵐壁臨空盡。卻看星辰向地懸。有興寄題紅葉上。不妨收拾別爲編。

山中寄凝密大師兄弟

一爐薪盡室空然。萬象何妨在眼前。時有興來還覓句。已無心去卽安禪。山門影落秋風樹。水國光凝夕照天。借問荀家兄弟內。八龍頭角讓誰先。

海棠花

繁於桃李盛於梅。寒前旬前社後開。半月暄和留豔態。雨時風雨免傷摧。人憐格異詩重賦。蜨戀香多夜復來。猶得殘紅向春暮。牡丹相繼發池臺。



寄文浩百法

聞欲擁  
毳參禪

當時六祖在黃梅。五百人中眼獨開。入室偈聞傳絕唱。昇堂客謾恃多才。鐵牛無用成真角。石女能生是聖胎。聞說欲拋經論去。莫教惆悵卻空迴。

謝元願上人遠寄檀溪集

白首蕭條居漢浦。清吟編集號檀溪。有人收拾應如玉。無主知音只似泥。入理半同黃葉句。遣懷多擬碧雲題。猶能爲我相思在。千里封來夢澤西。

贈智滿三藏

灌頂清涼一滴通。大毗盧藏遍虛空。欲飛簷蔔花無盡。須待陀羅尼有功。金杵力摧魔界黑。水精光透夜燈紅。可堪東獻明天子。命服新酬贊國風。

謝王先輩湘中迴惠示卷軸

少小卽懷風雅情。獨能遺象琢淳精。不教霜雪侵元鬢。便向雲霄換好名。攜去湘江聞鼓瑟。袖來緱嶺伴吹笙。多君百首貽衰颯。留把吟行訪竺神。

謝武陵徐巡官遠寄五七字詩集

五字才將七字爭。爲君聊敢試懸衡。鼎湖菡萏搖金影。蓬島鸞皇舞翠聲。還是靈龜巢得穩。要須仙子駕

方行兩邊珍重遙相惠。何夕燈前盡此情。

重宿舊房與愚上人靜話

曾此棲心過十冬。今年瀟灑屬生公。檀欒舊值青添翠。菡萏新栽白換紅。北面城臨燈影合。西隣壁近講聲通。不知門下趨筵士。何似當時石解空。

荆門病中雨後書懷寄幕中知己

病根翻作憶山勞。一雨聊堪浣鬱陶。心白未能忘水月。眼青獨得見秋毫。蟬聲晚簇枝枝急。雲影平分片片高。還憶赤松兄弟否。別來應見鶴衣毛。

宿江寺

烏僧留宿慰衰顏。舊住何妨老未還。身共錫聲離鳥外。跡同雲影過人間。曾無夢入朝天路。憶有詩題隔海山。珍重來晨渡江去。九華青裏扣松關。

謝貫微上人寄示古風今體四軸

四軸騷詞書八行。捧吟肌骨遍清涼。謾求龍樹能醫眼。休問圖澄學洗腸。今體盡搜初剖判。古風淳鑿未元黃。不知誰肯降文陣。闡點旌旗敵子房。

荊州貫休大師舊房

疎篁抽筍柳垂陰。舊是休公種境吟。入貢文儒來請益。出官卿相駐過尋。右軍書畫神傳髓。康樂文章夢

授心銷得青城千嶂下。白蓮標塔帝恩深。

寄谷山長老

遊遍名山祖遍尋。卻來塵世渾光陰。肯將的的吾師意。擬付茫茫弟子心。豈有虛空遮道眼。不妨文字問知音。滄浪萬頃三更月。天上何如水底深。

寄黃暉處士

蒙氏藝傳黃氏子。獨聞相繼得名高。鋒鋸妙奪金雞距。纖利精分玉兔毫。濡染只應親賦詠。風流不稱近方刀。何妨寄我臨池興。忍使江淹役夢勞。

荆門勉懷寄道林寺諸友

榮枯得失理昭然。誰數離騷更問天。生下便知真夢幻。老來何必歎流年。清風不變詩應在。明月無蹤道可傳。珍重匡廬沃洲主。拂衣拋卻好林泉。

答崔校書

雪色衫衣絕點塵。明知富貴是浮雲。不隨喧滑迷真性。何用潺湲洗濁聞。北闕會拋紅駿馱。東林社憶白氛氲。清吟有興頻相示。欲得多慙橐蝕文。

乞櫻桃

去年曾賦此花詩。幾聽南園爛熟時。嚼破紅香堪換骨。摘殘丹顆欲燒枝。流鶯偷啄心應醉。行客潛窺眼。

亦癡聞說張筵就珠樹。任從攀折半離披。

寄南雅上人

曾得音書慰暮年。相思多故信難傳。清吟何處題紅葉。舊社空懷墮白蓮。山水本同真趣向。侯門剛有薄因緣。他時不得君招隱。會逐南歸楚客船。

寄歐陽侍郎

時在嘉州饋遺

又聞繁總在嘉州。職重身閑倚寺樓。大象影和山面落。西江聲合郡前流。棋輕國手知難敵。詩是天才肯易酬。畢竟男兒自高遠。從來心不是悠悠。

與崔校書靜話來懷

同年生在咸通裏。事佛爲儒趣盡高。我性已甘披祖衲。君心猶待脫藍袍。霜髭曉幾臨銅鏡。雪鬢寒疎落剃刀。出世朝天俱未得。不妨還往有風騷。

謝人惠拄杖

邛州靈境產修篁。九節材應表九陽。造化已能分尺度。保持爭合與尋常。幽林剪破清秋影。高手攜來綠玉光。深謝魯儒憐潦倒。欲教撐拄遶禪牀。

謝秦府推官寄丹臺集

秦王手筆序丹臺。不錯褒揚最上才。鳳闕幾傳爲匠碩。龍門曾用振風雷。錢郎未竭精華去。元白終存作者來。兩軸蚌胎驪頰耀。枉臨禪室伴寒灰。

題畫鷺鷥兼簡孫郎中

曾向滄江看不真。卻因圖畫見精神。何妨金粉資高格。不用丹青點此身。蒲葉岸長堪映帶。荻花叢晚好相親。思量畫得勝籠得。野性由來不戀人。

賀行軍太傅得白氏東林集

樂天歌詠有遺編。留在東林伴白蓮。百尺典墳隨喪亂。一家風雅獨完全。常聞荆渚通侯論。果遂吳都使者傳。仰賀斯文歸朗鑒。永資聲政入薰絃。

韶陽微公

曲江晴影石千株。吾子思歸夢斷初。有信北來山疊疊。無言南去雨疎疎。祖師門接園林住。丞相家同井邑居。閑野老身留得否。相招多是秀才書。

將之匡岳過尋陽

帆過尋陽晚霽開。西風北雁似相催。大都浪後青堆沒。五老雲中翠疊來。此路便堪歸水石。何門更合向塵埃。遠公林下蓮池畔。箇箇高人盡有才。

寄湘幕王重書記

拋擲激江舊釣磯。日參籌畫廢吟詩。可能有事關心後。得似無人識面時。官好近聞加茜服。藥靈曾說換霜髭。高才直氣平生志。除卻徒知卽不知。

宿沈彬進士書院

相期只爲話篇章。踏雪曾來宿此房。喧滑盡消城漏滴。窗扉初掩岳茶香。舊山春暖生薇蕨。大國塵昏懼殺傷。應有太平時節在。寒宵未臥共思量。

送白處士遊峨嵋

閑身誰道是羈遊。西指峨嵋碧頂頭。琴鶴幾程隨客棹。風霜何處宿龍湫。尋僧石磴臨天井。斲藥秋崖倒瀑流。莫爲寰瀛多事在。客星相逐不迴休。

寄顧蟾處士

好於山水

久聞爲客過蒼梧。休說攜家歸鏡湖。山水顛狂應盡在。髮毛凋落免貧無。和僧搶入雲中峭。帶鶴驅成澗底孤。春醉醒來有餘興。因人乞與武陵圖。

懷金陵知舊

海門相別住荆門。六度秋光兩鬢根。萬象倒心難蓋口。一生無事可傷魂。石頭城外青山疊。北固窗前白浪翻。盡是共游題版處。有時惆悵拂苔痕。

喜得自牧上人書

吳都使者泛鷗濤。靈一傳書慰毳袍。別興偶隨雲水遠。知音本自國風高。身依閑淡中消日。髮向清涼處落刀。聞著括囊新集了。擬教誰與序離騷。

聞沈彬赴吳都請辟

長訝高眠得穩無。果隨徵辟起江湖。鴛鴦已列罇罍貴。鷗鶴休懷釣渚孤。白日不妨扶漢祚。清才何讓賦吳都。可能更憶相尋夜。雪滿諸峯火一爐。

寄江夏仁公

寺閣高連黃鶴樓。簷前檻底大江流。幾因秋霽澄空外。獨爲詩情到上頭。白日有餘閑送客。紫衣何啻貴封侯。別來多少新吟也。不寄南宗比老邱。

送劉秀才歸桑水寧觀

歸和初喜戢戈矛。乍捧鄉書感去留。雁序分飛離漢口。鴿原鷺鷥在鰲頭。家隣紫塞仍千里。路過黃河更幾州。應到高堂問安後。卻攜文入帝京遊。

寄曹松

舊制新題削復刊。工夫過甚琢琅玕。藥中求見黃芽易。詩裏思聞白雪難。扣寂頗同心在定。鑿空何止髮衝冠。夜來月苦懷高論。數樹霜邊獨傍欄。

酬蜀國歐陽學

因緣劉表駐經行。又聽西風墮葉聲。鶴髮不堪言此世。峨眉空約在他生。已從禪祖參真性。敢向詩家認好名。深愧故人憐潦倒。每傳仙語下南荆。

寄荆幕孫郎中

珠履風流憶富春。三千鸛鷺讓精神。詩工鑿破清求妙。道論研通白見真。四座共推操檄健。一家誰信買書貧。別來鄉國魂應斷。劍閣東西盡戰塵。

謝王詹事垂訪

鳥外孤峰未得歸。人間觸類是無機。方悲鹿軫棲江寺。忽訝輶車降竹扉。王澤乍聞譚渙汗。國風那得話元微。應驚老病炎天裏。枯骨肩橫一衲衣。

和李書記

繁極全分青帝功。開時獨占上春風。吳姬舞雪非真豔。漢后題詩是怨紅。遠蜨戀香拋別苑。野鶯銜得出深宮。君看萬態當筵處。羞殺薔薇點翠叢。

謝孫郎中寄示

一念禪餘味國風。早因持論偶名公。久傷琴喪人亡後。忽有雲和雪唱同。繩琢靜聞罽象外。是非閑見寂寥中。時來日往緣真趣。不覺秋江度塞鴻。



寄懷東林寺匡白監寺

南岳別來無約後。東林歸住有前緣。閑搜好句題紅葉。靜斂霜眉對白蓮。雁塔影分疎檜月。虎溪聲合幾峰泉。修心若似伊耶舍。傳記須添十九賢。

謝人惠十色花箋并棋子

陵州棋子浣花箋。深愧攜來自錦川。海蚌琢來星落落。吳綾隱出雁翩翩。留防桂苑題詩客。惜寄桃源敵手仙。捧受不堪思出處。七千餘里劍門前。

夏日寓居寄友人

北遊兵阻復南還。因寄荊州病掩關。日月坐銷江上寺。清涼魂斷剡中山。披緇影跡堪藏拙。出世身心合向閑。多謝扶風大君子。相思時到寂寥間。

中秋十四日夜對月上南平主人

今宵前夕皆堪翫。何必圓時始竭才。空說輪中有天子。不知何處是樓臺。終憂明夜雲遮卻。且掃閑居坐看來。玉兒銀蟾似多意。乍臨棠樹影裴回。

荊門病中寄懷鄉人歐陽侍郎彬

誰會荊門一老夫。夢勞神役憶匡廬。碧雲雁影紛紛去。黃葉蟾聲漸漸無。口淡莫分餐氣味。身羸但覺病肌膚。可憐饌玉燒蘭者。肯慰寒偎雪夜爐。

寄酬秦府高推官輦

天台衡嶽舊曾尋。閑憶留題白石林。歲月已殘衰颯鬢。風騷猶壯寂廖心。緱山碧樹遮藏密。丹穴雲霞掩映深。爭得相逢一攜手。拂衣同去聽元音。

敘懷寄高推官

搜新編舊與誰論。自向無聲認有聲。已覺愛來多廢道。可堪傳去更沾名。風松韻裏忘形坐。霜月光中共影行。還勝御溝寒夜水。狂吟衝尹甚傷情。

送朱侍御自洛陽歸閩州寧觀

尋常西望故園時。幾處魂隨落照飛。客路舊縈秦甸出。鄉程今遶漢陽歸。已過巫峽沈青靄。忽認峨眉在翠微。從此倚門休望斷。交親喜換老萊衣。

# 全五代詩卷九十七

## 荆南

齊 己九

貽惠暹上人

經論功餘更業詩。又於難裏縱天機。吳朝客見投文去。楚國僧迎著紫歸。已得聲名先振俗。不妨風雪更探微。金陵高憶恩門在。終挂雲帆重一飛。

酬西蜀廣濟大師見寄

猶得吾師繼頌聲。百篇相愛寄南荆。卷開錦水霞光爛。吟入峨眉雪氣清。楚外已甘推絕唱。蜀中誰敢共懸衡。應憐無可同無本。終向風騷作弟兄。

江寺春殘寄幕中知己二首

誰遣西來負岳雲。自由歸去竟何因。山龕薜荔應殘雪。江寺玫瑰又度春。早歲便師無學士。臨年卻作有爲人。何妨夜醮時相憶。伴醉佯狂笑老身。社蓮慙與幕蓮同。岳寺蕭條儉府雄。冷淡獨開香火裏。殷妍行列綺羅中。秋加玉露何傷白。夜醉金缸不那紅。閑憶遺民此心地。一般無染喻真空。

寄玉泉實仁上人

往歲曾尋聖跡時。樹邊三遶禮吾師。敢望護法將軍記。且喜焚香弟子知。後會未期心的的。前峰欲下步遲遲。今來老劣難行甚。空寂無緣但寄詩。

荆渚感懷寄僧達禪弟

雷繫流年七十三。齒衰氣沮竟何堪。誰云有句傳天下。自愧無心寄嶺南。曉漱氣嫌通市井。晚烹香憶落雲潭。鄰峰道者應彈指。薜剝藤纏舊石龕。

十五年前會虎溪。白蓮齋後便來西。干戈時變信雖絕。吳楚路長魂不迷。黃葉喻曾同我悟。碧雲情近無誰攜。春殘相憶荆江岸。一隻杜鵑頭上啼。

寄孫魴秀才

郡樓東面寺牆西。顏子生涯竹屋低。書案飛颺風落絮。地苔狼藉燕銜泥。吟窗晚凭春篁密。行徑斜穿夏菜齊。別後相思頻夢到。二年同此賦閑題。

送李評事往宜春

蘭舟西去是通津。名郡賢侯下禮頻。山遍寺樓看仰岫。臺連城閣上宜春。鴻心夜過鄉心亂。雪韻朝飛句韻新。別有官榮身外趣。月江松徑訪禪人。

中春感興

春風日日雨時時。寒力潛從暖氣衰。一氣不言含有象。萬靈何處謝無私。詩通物理行堪掇。道合天機坐可窺。應是正人持造化。盡驅幽細入鑪錘。

酬尙顏上人

紫綬蒼髭百歲侵。綠苔芳草遶堦深。不妨好鳥喧高臥。切忌閑人聒正吟。魯鼎寂寥休辨口。劫灰銷變莫喧心。還憐我有冥搜癖。時把新詩過竹尋。

寄倪署郎中

風雨冥冥春閣移。紅殘綠滿海棠枝。帝鄉久別江鄉住。春筍何如櫻筍時。海內擅名君作賦。林間外學我爲師。近聞南國升南省。應笑無機老病師。

題鄭郎中谷仰山居

簷壁層層映水天。半乘岡壠半民田。王維愛甚難拋畫。支遁憐多不惜錢。巨石盡含金玉氣。亂峰深鎖棟梁烟。秦爭漢奪虛勞力。卻是巢由得穩眠。

湘中寓居春日感懷

江禽野獸兩堪傷。避射驚彈各自忙。頭角任多無獬豸。羽毛雖衆讓鴛鴦。落苔紅小櫻桃熟。侵井青纖燕麥長。吟罷離騷憶前事。汨羅春浪撼殘陽。

寄友生

風騷情味近如何。門底寒流屋裏莎。曾摘園蔬留我宿。共吟江月看鴻過。時危苦恨無收拾。道妙深誇有琢磨。涼夜欹眠應得夢。平生心肺似君多。

酬答退上人

鬚鬢三分白二分。一生蹤跡出人羣。嵩丘夢憶諸峯雪。衡岳禪依五寺雲。青衲幾臨高瀑濯。苦吟曾許斷猿聞。荒村殘臘相逢夜。月滿鴻多楚水濱。

寄鄭谷郎中

上國誰傳消息過。醉眼醒坐對嵯峨。身離道士衣裳少。筆答禪師句偈多。南岸郡鐘涼度枕。西齋竹露冷霑莎。還應笑我降心外。惹得詩魔助佛魔。

寄萍鄉唐稟正字

新書聲價滿星都。高臥林中更起無。春興酒香薰肺腑。夜吟雲氣溼髭鬚。同登水閣僧皆別。共上漁船鶴亦孤。長憶前年送行處。洞門殘日照菖蒲。

秋夕書懷

涼多夜永擁山袍。片石閑欹不覺勞。蟋蟀遠牀無夢寐。梧桐滿地有蕭騷。平生樂道心常切。五字逢人價合高。破落西窗向殘月。露聲如雨滴蓬蒿。

亂後經西山寺

松燒寺破是刀兵。谷變陵遷事可驚。雲裏乍逢新住主。石邊重憶舊題名。閑臨菡萏荒池坐。亂踏鴛鴦破瓦行。欲伴高僧重結社。此身無計拾前程。

塘上閑作

閑行閑坐藉莎烟。此興堪思二古賢。陶靖節思彭澤畔。賀知章在鏡池邊。鴛鴦著對能飛繡。菡萏成羣不語仙。形影騰騰夕陽裏。數峰危翠滴漁船。

送人自蜀迴南遊

錦水東浮情尙鬱。湘波南泛思何長。蜀魂巴狄悲殘夜。越鳥燕鴻叫夕陽。烟月幾般爲客路。林泉四絕是吾鄉。尋幽別有僧相指。宋杜題詩是舊房。

寄元願上人

六十八去七十歲。與師年鬢不爭多。誰言生死無消處。還有修行那得何。開士安能窮好惡。故人堪憶舊經過。會歸原上焚身後。一陣灰飛也□□。

謝橘洲人寄橘

洞庭栽種似瀟湘。綠遶人家帶夕陽。霜裏露蒸千樹熟。浪圍風撼一洲香。洪崖遣後名何遠。陸續懷來事更長。藏貯待供賓客好。石榴宜稱映舟光。

自貽

心中身外更何猜。坐石看雲養聖胎。名在好詩誰逐去。跡依閑處自歸來。時添瀑布新瓶水。旅換旃檀舊印灰。晴出寺門驚往事。古松千尺半蒼苔。

寄益上人

長想尋君道路遙。亂山霜後火新燒。近聞移住鄰衡岳。幾度題詩上石橋。古木傳聲連峭壁。一燈懸影過中宵。風騷味薄誰相愛。欹枕常多夢鮑昭。

行次宜春寄湘西諸友

幸無名利路相迷。雙履尋山上柏梯。衣鉢祖辭梅嶺外。香燈社別橘洲西。雲中石壁青侵漢。樹下苔錢綠遶溪。我愛遠遊君愛住。此心他約與誰攜。

送略禪者歸南岳

林下鐘殘又拂衣。錫聲還獨向南飛。千峰合截冥鴻處。一徑險通禪客歸。青石上行苔片片。古杉邊宿雨霏霏。勞生有願應回首。忍著無心與物違。

詠懷寄知己

已得浮生到老閑。且將新句擬元關。自知清興來無盡。誰道淳風去不還。三百正聲傳世後。五千真理在人間。此心終待相逢說。時復登樓看暮山。

寄吳拾遺



新竹將誰推重輕。皎然評裏見權衡。非無苦到難搜處。合有清垂不朽名。疎雨晚衝蓮葉響。亂蟬涼抱檜梢鳴。野橋閑背殘陽立。翻憶蘇卿送子卿。

謝道友拄杖

剪自南巖瀑布邊。寒光七尺乳珠連。持來未入塵埃路。乞與應憐老病年。欹影夜歸青石澗。卓痕秋過綠苔錢。他時攜上嵩峰頂。把倚長松看洛川。

東林寄別修睦上人

行心乞得見秋風。雙履難留去住蹤。紅葉正多離社客。白雲無限向嵩峰。囊中自欠詩千首。身外誰知事幾重。此別不能爲後約。年華相似逼衰容。

夏日原西避暑寄吟友

熱煙疎竹古原西。日日乘涼此杖藜。閑處雨聲隨霹靂。早田人望隔虹霓。蟬依獨樹乾吟苦。鳥憐平川渴過齊。別有相招好泉石。瑞花瑤草盡堪攜。

憶匡阜

荊州城歲滯遊方。拄杖塵封六尺光。洗面有香思石溜。冥心無撓憶山床。閑機但媿時機速。靜論須慙世論長。昨夜分明夢歸去。薜蘿幽逕遶禪房。

答禪者

五老峰前相遇時。兩無言語只揚眉。南宗北祖皆如此。天上人間更問誰。山衲靜披雲片片。鐵刀涼削髮絲絲。閑吟莫學湯從事。拋卻袈裟負本師。

梓栗杖送人

禪家何物贈分襟。只有天台杖一尋。拄去客歸青洛遠。採來僧入白雲深。遊山曾把探龍穴。出世期將指佛心。此日江邊贈君後。卻攜筇杖向東林。

寄朗陵二禪友

瀟湘曾宿話詩評。荆楚連秋阻野情。金錫罷遊雙鬢白。鐵盂終守一齋清。篇章老欲齊高手。風月閑思到極精。南望山門石何處。滄浪雲夢浸天橫。

燈

幽光耿耿草堂空。窗隔飛蛾恨不通。紅燼自凝清夜朵。赤心長謝碧紗籠。雲藏水國城臺裏。雨閑松門殿塔中。金屋玉堂閒照睡。豈知螢雪有深功。

寄金陵幕巾有郎中

龍門支派富才能。年少飛翔便大鵬。久待尊罍臨鐵甕。又從旛節鎮金陵。精神一隻秋空鶴。騷雅千尋夏井冰。長憶相招宿華館。數宵忘寢盡寒燈。

寄韓蛻秀才

松門高不似侯門。蘇逕鞋蹤觸處分。遠事卽爲無害鳥。多閑便是有情雲。那憂寵辱來驚我。且寄風騷去敵君。和伴李膺琴酒外。絳紗閑卷共論文。

湘中春興

雨歇江明苑樹乾。物妍時泰恣遊盤。更無輕翠勝楊柳。盡覺濃華在牡丹。終日去還拋寂寞。遶池迴卻凭闌干。紅芳片片由青帝。忍向西園看落殘。

送錯公栖公南遊

洪偃湯休道不殊。高帆共載興何俱。北京喪亂離丹鳳。南國煙花入鷓鴣。明月團圓臨桂水。白雲重疊起蒼梧。威儀本是朝天士。暫向遼荒住得無。

寄南岳諸道友

南望衡陽積瘴開。去年曾踏雪遊迴。謾爲楚客蹉跎過。卻是邊鴻的當來。乳竇孤明含海日。石橋危滑長春苔。終尋十八高人去。共坐蒼崖養聖胎。

送韓蛻秀才赴舉

槐花館驛暮塵昏。此去分明吏部孫。才器合居科第首。風流幸是縉紳門。春和洛水清無浪。雪洗高峰碧斷根。堪想都人齊指點。列仙相次上崑崙。

溪居寓言

秋蔬數壟傍潺湲。頗覺生涯異俗緣。詩興難窮花草外。野情何限水雲邊。蟲聲遶屋無人語。月影當松有鶴眠。寄向東溪老樵道。莫摧丹桂博青錢。

遣懷

詩病相兼老病深。世醫徒更費千金。餘生豈必虛拋擲。未死何妨樂詠吟。流水不迴休歎息。白雲無跡莫追尋。閑身自有閑消處。黃葉清風蟬一林。

自湘中將入蜀留別諸友

巾舄初隨入蜀船。風帆吼過洞庭煙。七千里路到何處。十二峰雲更那邊。巫女暮歸林浙瀝。巴猿吟斷月嬋娟。來年五月峨眉雪。坐看消融滿錦川。

寄匡阜諸公二首

松頭柏頂碧森森。虛檻寒吹夏景深。靜社可追長往跡。白蓮難問久修心。山圍四面纔容寺。月到中宵始滿林。爭學忘言住幽勝。吾師遺集盡清吟。

峯前林下東西寺。地角天涯來往僧。泉月淨流閑世界。杉松深鎖盡香燈。爭無大士重修社。合有諸賢更服膺。曾寄鄰房挂餅錫。雨聞巖溜解春冰。

酬廬山張處士

髮枯身老任浮沈。嬾泥秋風更役吟。新事向人堪結舌。舊時開卷但傷心。苔牀臥憶泉聲遶。麻履行思樹

影深終謝柴桑與彭澤。醉遊閑訪入東林。

寄峴山道人

鳳門高對鹿門青。往歲經過恨未平。辯鼎上人方話道。臥龍丞相忽追兵。爐峰已負重迴計。華嶽終懸未去情。聞說東周天子聖。會搖金錫卻西行。

懷金陵李推官僧自牧

秣陵長憶共吟遊。儒釋風騷道上流。蓮幕少年輕謝眺。雪山真子鄙湯休。也應有作懷清苦。莫若無心過白頭。欲附別來千萬意。病身初起向殘秋。

寄尋萍公

聞在湓城多寄住。隨時談笑渾塵埃。孤峯恐憶便歸去。浮世要看還下來。萬頃野煙春雨斷。九條寒浪晚窗開。虎溪橋上龍潭寺。曾此相尋踏雪迴。

得李推官近寄懷

荆門前歲使乎迴。求得星郎近制來。連日借吟終不已。一燈忘寢又重開。秋風漫作牽情賦。春草真爲入夢才。堪笑陳宮諸狎客。當時空有箇追陪。

對菊

蝶醉風狂半折時。冷煙清露壓離披。欲傾琥珀盃浮爾。好把茱萸朵配伊。孔雀毛衣應者是。鳳凰金翠更

無之。何因栽向僧園裏。門外重陽過不知。

憶東林因送二生歸

好向東林度此生。半天山腳寺門平。紅霞嶂底潺潺色。清夜房前瑟瑟聲。偶別十年成瞬息。欲來千里阻刀兵。可憐二子同歸興。南國煙花路好行。

渚宮西城池上居

城東移錫住城西。綠遶春波引杖藜。翡翠滿身衣有異。鷺鷥通體格非低。風搖柳眼開煙小。暖逼蘭芽出土齊。猶有幽深不相似。剡溪乘櫂入耶溪。

中秋夕愴懷寄荆幕孫郎中

白蓮香散沼痕乾。綠篠陰濃薜地寒。年老寄居思隱切。夜涼留客話時難。行僧尋去雲山遠。賓雁同來澤國寬。時謝孔璋操檄外。每將空病問衰殘。

酬湘幕徐員外見寄

東海儒宗事業全。冰稜孤峭類神仙。詩同李賀精通鬼。文擬劉軻妙入禪。珠履早曾從相府。玳簪今又別官筵。篇章幾謝傳西楚。空想雄風度十年。

寄蜀國廣濟大師

冰壓霜壇律格清。三千傳授盡門生。禪心盡入空無跡。詩句閑搜寂有聲。滿國鯨華徒自樂。兩朝更變未

曾驚終思相約岷峨去。不得攜筇一路行。

答獻上人卷

衲衣禪客袖篇章。江上相尋共感傷。秦甸亂來栖自沒。杼山空後皎然亡。清留島月秋凝露。苦寄巴猿夜叫霜。珍重南宗好才子。灰心冥目外無妨。

寄武陵貫微上人二首

知泛滄浪櫂未還。西峰房鎖夜潺潺。春陪相府遊仙洞。雪共賓寮對玉山。詩裏幾添新菡萏。衲痕應換舊爛斑。莫忘一句曾溪妙。堪塞孫孫騁度關。  
吳頭東面楚西邊。雲接蒼梧水浸天。兩地別離身已老。一言相合道休傳。風騷妙欲凌春草。蹤跡閑思遶嶽蓮。不是傲他名利世。吾師本在雪山巔。

懷體休上人

仲宣樓上望重湖。君到瀟湘得健無。病遇何人分藥餌。詩逢誰子論功夫。杉羅寺裏尋秋早。橘柚洲邊度日晡。許送自身歸華嶽。待來朝暮拂餅盂。

招湖上兄弟

去歲得君消息在。兩憑人信過重湖。忍貪風月當年少。不寄音書慰老夫。藥鼎自聞傳祕訣。詩門曾說擁寒爐。漢江江路西來便。好傍扁舟訪我無。

江居寄關中知己

多病多慵漢水邊。流年不覺已皤然。舊栽花地添黃竹。新陷盆池換白蓮。雪月未望招遠客。雲山終待去安禪。八行書札君休君。不似風騷寄一篇。



# 全五代詩卷九十八

## 荆南

齊 己十

靜坐

繩牀欲坐任崩頽。雙眼醒醒閉復開。日月更無閑裏過。風騷時有靜中來。天真自得生難捨。世幻誰驚死不迴。何處堪投此蹤跡。水邊晴去上高臺。

寄湘中諸友

碧雲諸友盡黃眸。石點花飛更說無。嵐翠溼衣松接院。芙蓉薰面寺臨湖。沃洲高臥心何□。□□長禪興亦孤。爭似楚王文物國。金鑣紫綬讓前途。

答元願上人書

鄭生驅蹇峴山迴。傳得安公好信來。千里阻修俱老骨。八行重叠慰寒灰。春殘桃李猶開戶。雪滿松杉始上臺。別有南遊山水興。漢江平穩好浮杯。

送允公歸闕

西朝歸去見高情。應戀香燈近聖明。關令莫疑非馬辯。道安還跨赤驢行。充齋野店蔬無味。灑笠平原雪

有聲。忍惜文章便閑得。看他趨競取時名。

感時

忽忽枕前蝴蝶夢。悠悠覺後利名塵。無窮今日明朝事。有限生來死去人。終與狐狸爲窟穴。謾師龜鶴養精神。可憐顏子能消息。虛空坐忘心最真。

湖上逸人

澹蕩光中翡翠飛。田田初出柳絲絲。吟沿綠島時逢鶴。醉泛清波或見龜。七澤釣師應識我。中原逐鹿不知誰。秋風水寺僧相近。一徑蘆花到竹籬。

懷巴陵

垂白堪思大亂前。薄遊曾駐洞庭邊。尋僧古寺沿沙岸。倚杖殘陽落木天。蘭棹蕪菸騷客廟。烟波晴閣釣師船。此時欲買君山住。懶就商人乞箇錢。

渚宮謝楊秀才自嵩山相訪

嵩峰有客遠相尋。塵滿麻衣袖苦吟。花盡草長方閉戶。道孤身老正傷心。紅堆落日雲千仞。碧撼涼風竹一林。惆悵雅聲消歇去。喜君聊此暫披襟。

荆門寄沈彬

罷趨明聖嬾從和。鶴氅褱襪遂性披。道有靜君堪托迹。詩無賢子擬傳誰。松聲白石邊行上。日影紅霞裏

夢思珍重兩篇千里達。去年江上雪飛時。

讀陰符經

透窗風竹骨輕安。閑借陰符仰臥看。絕利一源真有謂。空勞萬卷是無端。清虛可保昇雲易。嗜欲終知入聖難。三要洞開何用閉。高臺時去凭欄干。

移居

上台言任養疎愚。乞與西城水滿湖。吹榻好風終日有。趁涼閑客片時無。檀欒翠擁清蟬在。菡萏紅殘白鳥孤。欲問存思搜挾妙。幾聯詩許敵三都。

喜彬上人見訪

高吟欲繼沃洲師。千里相尋問課虛。殘臘江山行盡處。滿衣風雪到閑居。攜來律韻清何甚。趣入幽微旨不疎。莫惜天機細搥琢。他時終可攜芙蕖。

荊州新秋寺居寫懷詩五首上南平王

竹如翡翠侵簾影。苔學琉璃布地紋。高臥更無如此樂。遠遊何必愛他雲。閑聽謝眺吟爲政。靜看蕭何坐致君。只恐老身衰朽速。他年不得頌鴻勳。

井梧黃落暮蟬清。久駐金臺但暗驚。事佛未憐諸弟子。談空爭動上公卿。合歸鳥外藏幽跡。敢向人前認好名。滿印白檀燈一盞。可能酬謝得聰明。

金湯裏面境何求。寶殿東邊院最幽。栽種已添新竹影。畫圖兼列遠山秋。形容豈合親公子。章句爭堪狎士流。虛負岷峨老僧約。年年雪水下汀洲。

漢江西岸蜀江東。六稔安禪教化中。託跡幸將王粲別。歸心寧與子山同。尊曩豈識曹參酒。賓客還親宋玉風。又見去年三五夕。一輪寒魄破煙空。

石龕閑鎖舊居峰。何事膺門歲月重。五七詩中叨見遇。三千客外許疎慵。迎涼蟋蟀喧閑思。積雨莓苔沒屐蹤。會待英雄啓金口。卻教擔錫入雲松。

送李秀才歸湘中

詞客攜文訪病夫。因吟送別憶湘湖。寒消浦溆催鴻雁。暖入溪山養鷓鴣。僧向月中尋岳麓。雲從城上去蒼梧。君歸爲問峰前寺。舊住僧房鎖在無。

寄吳國西供奉

別來相憶夢多迷。君住東朝我楚西。瑤闕合陪龍象位。春山休記鷓鴣啼。承恩位與千官別。應制才將十子齊。幾笑遠公慵送客。慙慙只到寺前溪。

謝人惠端溪硯

端人鑿斷碧溪溥。善價爭教惜萬金。礪琢已曾經妙手。研磨終見透堅心。安排得主難移動。含貯隨時任淺深。保重更求裝鈿匣。閑將濡染寄知音。

送吳先輩赴京

煙霄已遂明經第。江漢重來問苦吟。託興偶憑風月遠。忘機終在寂寥深。千篇未聽常徒口。一字須防作者心。此日與君聊話別。老身難約更相尋。

和西蜀可準大師遠寄之什

莫知何路去追攀。空想人間出世間。杜口已同居士室。傳心休問祖師山。禪中不住方爲定。說處無生始是閑。珍重希音遠相寄。辭峰西望疊孱顏。

荆門暮冬與節公話別

漳河湘岸柳關頭。離別相逢四十秋。我憶黃梅夢南國。君懷明主去東周。幾程霜雪經殘臘。何處封疆過舊遊。好及春風承帝澤。莫忘衰朽臥林邱。

賀孫支使郎中遷居

別認公侯禮上才。築金何啻舊燕臺。地連東閣橫頭買。門對西園正面開。不隔紅塵趨棨戟。只拖珠履赴尊罍。應逢明月清霜夜。閑領笙歌宴此來。

庭際新移松竹

三莖瘦竹兩株松。瑟瑟脩脩韻且同。抱節乍離新澗雪。盤根遠別舊林風。歲寒相倚無塵地。蔭影分明有月中。更待陽和信催促。碧梢青杪看凌空。

荆門寄題禪月大師影堂

澤國聞師泥日後。蜀王全禮葬餘灰。白蓮塔向清泉鎖。禪月堂臨錦水開。西岳千篇傳古律。大師著西岳集三十卷盛傳于世。南宗一句印靈臺。不堪隻履還西去。葱嶺如今無使迴。

賀雪

上清凝結下乾坤。爲瑞爲祥表致君。日月影從光外過。山河形向靜中分。歌揚郢路誰同聽。聲灑梁園客共聞。堪想畫堂簾卷次。輕隨舞袖正紛紛。

荊州寄貫微上人

舊齋休憶對松關。各在王侯顧遇間。命服已霑天渥澤。衲衣猶擁祖爛斑。相思莫救燒心火。留滯難移壓腦山。得失兩途俱不是。笑他高臥碧孱顏。

送休師歸長沙寧觀

高堂親老本師存。多難長懸兩處魂。已說戰塵消漢口。便隨征擢別荆門。晴吟野闊無耕地。晚宿灣深有釣村。他日更思衰老否。七年相伴琢詩言。

渚宮春日因懷有作

舊業樹連湘樹遠。家山雲與嶽雲平。僧來已說無耕釣。雁去那知有弟兄。客思莫牽蝴蝶夢。鄉心自憶鷓鴣

鵠聲沙頭南望堪腸斷。誰把歸舟載我行。

松化爲石

近聞金華山古松化爲石。

盤根幾聳翠崖前。卻偃凌雲化至堅。乍結精華齊永劫。不隨凋變已千年。逢賢必用鑄辭立。遇聖終將刻印傳。肯似荆山鑿餘者。蘚封頑滯臥松煙。

寄澧陽吳使君

南客西來話使君。涪陽風雨變行春。四鄰耕釣趨仁政。千里煙花壓路塵。去獸未勝除狡吏。還珠爭似復逋民。紅蘭浦暖攜才子。爛醉連題賦白蘋。

湘江送客

湘江秋色湛如冰。楚客離懷暮不勝。千里碧雲聞塞雁。幾程青草見巴陵。寒濤響疊晨征擗。岸葦叢明夜泊燈。鸚鵡洲邊若回首。爲思前事一捫膺。

暮遊岳麓寺

寺樓高出碧巖稜。城裏誰知在上層。初雪灑來喬木暝。遠禽飛過大江澄。閑消不睡憐長夜。靜照無言謝一燈。迴首何邊是空地。四村桑麥遍邱陵。

林下留別道友

位亦無依去是閑。何心終戀此林間。片雲孤鶴東西路。四海九州多少山。靜坐趁涼移樹影。興隨題處著苔斑。秋來洗浣行衣了。還爾隣僧舊竹關。

道林寺居寄岳麓禪師二首

門前石路徹中峰。樹影泉聲在半空。尋去未應勞上下。往來殊已捲西東。髭根盡白孤雲並。心跡全忘片月同。長憶高窗夏天裏。古松青檜午時風。山袍不稱下紅塵。各是閑居島外身。兩處烟霞門寂寂。一般苔蘚石磷磷。禪關悟後寧疑物。詩格元來不傍人。月照經行更誰見。露華松粉點衣巾。

亂後江西過孫魴舊居因寄

舊遊重到倍悲涼。吟憶同人倚寺牆。何處暮蟬喧逆旅。此中山鳥噪垂陽。寰區有主權兵器。風月無人掌桂香。欲寄此心空北望。塞鴻天末失歸行。

宜春江上寄仰山長老二首

來隔山城城隔山。水邊時望憶師閑。清泉白日中峰上。落日半空栖鳥還。雲影觸衣分朵朵。雨聲吹磬散潺潺。傳心莫學羅浮去。後輩思量待扣關。雨晴天半碧光流。影倒殘陽溼郡樓。絕頂有人經劫在。浮生無客暫時遊。窗開萬壑春泉亂。塔鎖孤燈萬木稠。欲爲吾師拂衣去。白雲紅葉又新秋。



寄居道林寺作

嵐溼南朝殿塔寒。此中因得謝塵寰。已同庭樹千株老。未負溪雲一片閒。石鏡舊遊臨皎潔。岳蓮曾上徹  
孱顏。如今衰颯成多病。黃葉風前晝掩關。

沙鷗

暖傍漁船睡不驚。可憐孤潔似華亭。晚來灣浦衝平碧。晴過汀洲拂淺青。翡翠靜中修羽翼。鴛鴦閑處事  
儀形。何如飛入漢宮裏。留與興亡作典經。

和翁員外題馬太傅宅賈相公井

飛塵不敢下相干。閹脈傍應潤牡丹。心任短長投玉綆。底須三五映金盤。神工舊製泓澄在。天澤時加漱  
灑寒。太傅欲旌前古事。星郎屬思久憑欄。

看雲

何峰觸石溼苔錢。便逐高風離瀑泉。深處臥來真隱逸。上頭行去是神仙。千尋有影滄江底。萬里無蹤碧  
落邊。長憶舊山青壁裏。遶菴閑伴老僧禪。

對雪寄荆幕知己

猛勢微開萬里清。月中看似日中明。此時鷗鷺無人見。何處關山有客行。郢唱轉高誰敢和。巴歌相顧自  
銷聲。江齋卷箔含毫久。應想梁王禮不經。

送相里秀才赴舉

兩上東堂不見春。文明重去有誰親。曾逢少海尊前客。舊是神仙會裏人。已遂風雲催化羽。卻將雷電助燒鱗。明年自此登龍夜。迴首荆門一路塵。

荆門疾中喜謝尊師自南嶽來相里秀才自京至

閑堂晝臥眼初開。強起徐行遶砌苔。鶴氅人從衡嶽至。鶉衣客自洛陽來。坐聞隣樹栖幽鳥。吟覺江雲發早雷。西笑東遊此相別。兩途消息待誰迴。

吟興自述

前習都由未盡空。生和雅學妙難窮。一千首出悲哀外。五十年銷雪月中。興去不妨歸靜慮。情來何止發真風。曾無一字千聲利。豈媿操心負主公。

送謝尊師自南嶽出入京

曾憶鹿鳴逢世亂。因披羽服入衡陽。幾多事隔丹霄興。三十年成兩鬢霜。芝木未甘銷勇氣。風騷無那激剛腸。中朝舊有知音在。可是悠悠入帝鄉。

送司空學士赴京

宏文初命下江邊。難戀沙鷗與釣船。藍綬乍稱新學士。白衫初脫舊神仙。龍山送別風生路。雞樹從容雪照筵。重謁往年金榜主。便將才術佐陶甄。

春寄尙顏

含桃花謝杏花开。杜宇新題燕子來。好事可能無分得。名山長似有人催。簷聲未斷前旬雨。電影還連後夜雷。心跡共師爭幾許。似人嫌處自遲迴。

寄梁先輩

慈恩塔下曲江邊。別後多應夢到仙。時去與誰論此事。亂來何處見同年。陳琳筆硯甘前席。用黑烟霞待共眠。愛惜麻衣好顏色。未教朱紫污天然。

荆渚偶作

無味吟詩卽把經。竟將疎野訪誰行。身依江寺庭無樹。山遶天涯路有兵。竹瓦雨聲漂永日。紙窗燈焰照殘更。從容一覺清涼夢。歸到龍潭掃石枰。

城中晚夏思山

葛衣露汗功雖健。紙扇搖風力甚卑。苦熱恨無行腳處。微涼喜到立秋時。竹軒靜看蜘蛛挂。莎徑閑聽蟋蟀移。天外有山歸卽是。豈同遊子暮何之。

憶舊山

誰請衰羸住北州。七年魂夢舊山邱。心清檻底瀟湘月。骨冷蟬中太華秋。高節未聞馴虎豹。片言可以做王侯。應須脫灑孤峯去。始是分明箇剃頭。

寄體休

南州君去爲尋醫。病色應除似舊時。久別莫忘廬阜約。卻來須有洞庭詩。金陵往歲同窺井。峴首前秋共讀碑。兩處山河見興廢。相思更切臥雲期。

過陸鴻漸舊居

陸生自有傳於井石又云  
行坐誦佛書故有此句

楚客西來過舊居。讀碑尋傳見終初。佯狂未必輕儒業。高尚何妨誦佛書。種竹岸香連菡萏。煮茶泉影落蟾蜍。如今若更生來此。知有何人贈白驢。  
時太守  
贈白驢

寄懷鍾陵舊遊因寄知己

洗井僧來說舊遊。西江東岸是城樓。昔年淹跡因王化。長日凭欄看水流。真觀上人棲樹石。陳陶處士在林邱。終拖老病重尋去。得到匡廬死便休。

遣懷

病腸休洗老休醫。七十能饒百歲期。不死任還蓬島客。無生自有雪山師。浮雲聚散俱關慮。明月相逢好展眉。旣兆未萌閑酌度。不如中抱是尋思。

懷武陵因寄幕中韓先輩何從事

武陵嘉致跡多幽。每見圖經恨白頭。溪浪碧通何處去。桃花紅過郡前流。常聞相幕鴛鴻興。日向神仙洞

府遊。鑿井耕田人在否。如今天子正徵搜。

贈樊處士

小子聲名天下知。滿簪霜雪白麻衣。誰將一著爭先後。共向長安定是非。有路未曾迷日用。無貪終不亂天機。閑尋道士過仙觀。賂得黃庭兩卷歸。

荆渚逢禪友

澤國相逢話一宵。雲山偶別隔前朝。社思匡岳無宗炳。詩憶揚州有鮑昭。晨野黍離春漠漠。水天星粲夜遙遙。閑吟莫忘傳心祖。曾立塔前雪到腰。

送僧歸洛中

赤日彤霞照晚坡。東州道路興如何。蟬離楚柳鳴猶少。葉到嵩雲落漸多。海內自爲閑去住。關頭誰問舊經過。叮嚀與訪春山寺。白樂天真在也麼。

道林寓居

秋泉一片樹千株。暮汲寒燒外有餘。青嶂這邊來已熟。紅塵那畔去應疎。風騷未肯忘雕琢。瀟灑無妨更剗除。卽問沃州開士僻。愛禽憐駿意如何。

仙掌

峭形寒倚夕陽天。毛女蓮花翠影連。雲外自爲高出手。人間誰合鬪揮拳。鶴拋青漢來巖檜。僧隔黃河望

頂煙晴露紅霞長滿掌。只因栖託是神仙。

送蟬者遊南岳

忽隨南櫂去衡陽。誰住江邊樹下房。塵夢是非都覺了。野雲心地更何妨。漸臨瀑布聽猿思。卻背岫嶺有雁行。想到中峰上層寺。石窗秋霽見瀟湘。

將歸荆山留荆錯公

舊峰前昨下來時。白石叢叢間紫薇。章句不堪歌有道。溪山只合退無機。雲含暖態晴猶在。鶴養閑神晝不飛。欲去更思過丈室。二年頻此揖清暉。

逢進士沈彬

欲話趨時首重騷。因君倍惜剃頭刀。千般貴在能過達。一片心閑不那高。山疊好雲藏玉鳥。海翻狂浪隔金鼇。時應記得長安事。曾向文場屬思勞。

聞王員外新恩有寄

欲退無因貴逼來。少儀官美右丞才。青氈早許淹花幕。霜簡方聞謝柏臺。金諾靜宜資講誦。玉山寒稱奉尊罍。西峰有客思相賀。門隔瀟湘雪未開。

秋夕言懷寄所知

休問蒙莊材不材。孤峰影共傍寒灰。忘筌話道心甘死。候體論詩口嬾開。窗外風濤連建業。夢中雲水憶

天台相疎卻是相知分。誰訝經年一度來。





# 全五代詩卷九十九

## 荆南

齊 己十一

謝人自鍾陵寄紙筆

故人猶憶苦吟勞。所惠何殊金錯刀。霜雪剪裁新刻硯。鋒鋸管束本宣毫。知君倒篋情何厚。借我臨池價斗高。詞客分張看欲盡。不堪來處隔秋濤。

移居西湖作二首

火雲陽焰欲燒空。小檻幽窗想舊峯。白汗此時流枕簟。清風何處動杉松。殘更正好眠涼月。遠寺俄聞報曉鐘。只待秋聲滌心地。衲衣新洗健形容。官園樹影晝陰陰。咫尺清涼莫浣心。桃李別教人主掌。煙花不稱我追尋。蜩螿晚噪風枝穩。翡翠閑眠宿處深。爭似出塵地行止。東林苔徑入西林。

題玉泉寺

高韻雙懸張曲江。聯題兼是孟襄陽。後人才地誰稱短。前輩經天盡負長。勝景飽於閑采拾。靈蹤銷得正思量。時移兩板成塵跡。猶挂吾師舊影堂。

題贈湘西龍安寺利禪師

頭白已無行腳念。自開荒寺住煙蘿。門前路到瀟湘盡。石上雲歸岳麓多。南祖衣盂曾禮謁。東林泉月舊經過。閑來松外看城郭。一片紅塵隔逝波。

寄道林寺諸友

吟興終依異境長。舊遊時入靜思量。江聲裏過東西寺。樹影中行上下方。春色溼僧中屨膩。松花沾鶴骨毛香。老來何計重歸去。千里重湖浪渺茫。

荆渚寄懷西蜀無染大禪師

大瀉心付白崖前。寶月分輝照蜀天。聖主降情延北內。諸侯稽首問南禪。清秋不動驪龍海。紅日不私罔象川。欲聽吾宗舊山說。地邊身老楚江邊。

謝南平王賜山雞

五色文章類彩鸞。楚人羅得半摧殘。金籠莫恨傷冠幘。玉粒須慙剪羽翰。孤立影危丹檻裏。雙棲伴在白雲端。上台愛育通幽細。卻放溪山去不難。

靜院

花院相重點破苔。誰心肯此話心灰。好風時傍疎篁起。幽鳥晚從何處來。筆硯興狂師沈謝。香燈魂斷憶宗雷。浮生已問空王了。箭急光陰一任催。

中春林下偶作

淨境無人可共攜。閑眠未起日光低。浮生莫把還丹續。萬事須將至理齊。花在月明蝴蝶夢。雨餘山綠杜鵑啼。何能向外求攀折。巖桂枝條拂石梯。

題南平後園牡丹

暖披煙豔照西園。翠幄朱欄護列仙。玉帳笙歌留盡日。瑤臺伴侶待歸天。香多覺受風光剩。紅重知含雨露偏。上客分明記開處。明年開更勝今年。

謝人惠十才子圖

丹青妙寫十才人。玉峭冰稜姑射神。醉舞離披真鸞鷲。狂吟崩倒瑞麒麟。翻騰造化山曾竭。採掇珠璣海幾貧。猶得知音與圖畫。草堂閑挂似相親。

荆渚感懷寄僧達禪弟

鶴嶺僧來細話君。依前高尙跡難羣。自拋南岳三生石。長傍西山數片雲。丹訪葛洪無舊竈。詩尋靈觀有遺文。莫將離別爲相隔。心似虛空幾處分。

早鶯

何處經年闕好音。暖風催出嚙喬林。羽毛新刷陶潛菊。喉舌初調叔夜琴。藏雨並棲紅杏密。避人雙入綠楊深。曉來枝上千般語。應共桃花在舊心。

題梁賢巽公房

吳王廟側有高房。簾影南軒日正長。  
吹苑野風桃葉碧。壓畦春露菜花黃。  
懸燈向後惟冥默。凭案前頭卽渺茫。  
知有虎溪歸夢切。寺門松折社僧亡。

懷瀟湘卽事寄友人

浸野淫空澹蕩和。十年隣住聽漁歌。  
城臨遠櫂浮煙泊。寺近閑人泛月過。  
岸雨綠蕪春雨細。汀連斑竹晚風多。  
可憐千古懷莎岸。還有魚龍弄白波。

春晴感興

連旬陰翳曉來晴。水滿圓塘照日明。  
岸草短長邊過客。江花紅白裏啼鶯。  
野無征戰時堪望。山有樓臺煖竹行。  
桑柘依依禾黍綠。可憐歸去是張衡。

寄吳國知舊

淮甸當年憶旅遊。衲衣樓笠外何求。  
城中古巷尋詩客。橋上殘陽皆酒樓。  
晴色水雲天合影。晚聲名利市爭頭。  
可憐王化融融裏。惆悵無僧似惠休。

江上夏日

無處清陰似剡溪。火雲奇崛倚空齊。  
千山冷疊湖光外。一扇涼搖楚色西。  
碧樹影疎風易斷。綠蕪平遠日難低。  
故園舊寺臨湘水。斑竹煙深越鳥啼。

透窗寄竹住還移。萬類俱閑始見伊。難把寸光藏暗室。自持孤影助明時。空庭散逐金風起。亂葉爭投玉露垂。後代書生懶收拾。夜深飛過讀書帷。

湘中送翁員外歸閩

船滿琴書與酒杯。清湘影裏片帆開。人歸南國鄉園去。雁逐西風日夜來。天勢漸底分梅樹。山城欲盡見城臺。此身未別江邊寺。猶看星郎奉詔迴。

中秋月侍宴獻秦王

空碧無雲露溼衣。羣星光外湧清規。東樓莫礙漸高勢。四海正看當路時。還許分明吟皓魄。肯教幽暗取丹枝。可憐半夜嬋娟影。正對五侯殘酒池。

十國春秋。齊已窺從榮有異志。獻此詩。幾得罪。已而脫歸。

聞道林諸友嘗茶因有寄

槍旗冉冉綠叢園。穀雨初晴叫杜鵑。摘帶嶽華蒸曉露。碾和松粉煮春泉。高人愛惜藏巖裏。白碓封題寄火前。應念苦吟耽睡起。不堪無過夕陽天。

聞尚顏上人剏居有寄

麓山南面橘洲西。別構新齋與竹齊。野客已聞將鶴贈。江僧來說有詩題。窗臨杳靄含千嶂。枕遍潺湲浚月

一溪可想乍移禪。一作楊處松陰冷溼壁新泥。

庚午歲九日作

門底秋苔嫩似藍。此中消息興何堪。亂離偷過九月九。頭尾算來三十三。雲影半晴開夢澤。菊花微暖傍江潭。故人今日在不在。胡雁皆風飛向南。

寄上顏

莫向孤峰道息機。有人偷眼羨吾師。滿身光化年前寵。幾軸開平歲裏詩。比闕故人隨喪亂。南山舊寺在參差。清吟自憶徐方政。應恨當時不見時。

送人入蜀

何必閑吟蜀道難。知君心出嶮巖間。尋常秋泛江陵去。容易春浮錦水還。兩面碧懸神女峽。幾重青出丈人山。文君酒市逢初雪。滿貫新沽洗旅顏。

送王處遊蜀

又挂寒帆入錦川。木蘭舟裏過殘年。自修姹姹爐中物。擬作飄飄水上仙。三峽浪喧明月夜。萬州山到夕陽天。來年的有荆南信。迴札應緘十色牋。

中秋十五夜寄人

高河瑟瑟轉金盤。歎露吹光逆凭欄。四海魚龍精魄冷。五山鸞鶴骨毛寒。今宵盡向圓時望。後夜誰當缺處看。何事清光與蟾兄。卻教才小少留難。

看金陵圖

六朝圖畫戰爭多。最是陳宮計數訛。若愛蒼生似歌舞。隋皇自合恥干戈。

寄南禪泰禪師

江頭默想坐禪峰。白石山前萬丈空。山下獵人應不到。雪殘花落。在菴中。

片雲

水底分明天上雲。可憐形影似吾身。何妨舒作從龍勢。一雨吹銷萬里雲。

寄清溪道者

萬重千疊紅霞嶂。夜燭朝香白石龕。常寄溪窗凭危檻。看經影落古龍潭。

病中勉送小師往清涼山禮大聖

豐衣足食處莫往。聖跡靈蹤好遍尋。忽遇文殊開慧眼。他年應記老師心。

謝人惠拄杖

何處雲根採得來。黑龍狂欲作風雷。知師念我形骸老。教把經行拄綠苔。

送楚雲上人往南嶽刺血寫法華經

剝皮刺血誠何苦。欲寫靈山九會文。十指瀝乾終七軸。後來求法更無君。

送胎髮筆寄仁公

內唯胎髮外秋毫。綠玉新裁管束牢。老病手疼無那爾。卻資年少寫風騷。

謝西川曇域大師玉筍篆書

玉筍真文久不興。李師傅到李陽冰。正悲千載無來者。果見僧中有箇僧。

偶作寄王祕書

七絲湘水秋深夜。五字河橋日暮時。借問祕書卽此意。靜彈高咏有誰知。

謝人惠紙

烘焙幾工成曉雪。輕明百幅疊春冰。何消才子題詩外。分與能書貝葉僧。

答文勝大師清柱書

纔把文章干聖主。便承恩澤換禪衣。應兼六祖傳空衲。只向曹溪求息機。

寄懷曾口寺文英大師

著紫袈裟名已貴。吟紅菡萏價兼高。秋風曾憶西遊處。門對平湖滿白濤。

懷道林寺道友

四絕堂前萬木秋。碧參差影壓湘流。閑思宋杜題詩板。一日憑欄到夜休。



辭主人絕句四首

放鶴

華亭來復去芝田。丹頂霜毛性可憐。縱與乘軒終悞主。不如還放卻遼天。

放猿

堪憶春雲十二峰。野桃仙杏摘香紅。王孫可念愁金鎖。從放斷腸明月中。

於鷺鷥

白萍紅蓼碧江涯。日暖雙雙立睡時。顧揭金籠放歸去。卻隨沙鶴鬪輕絲。

放鸚鵡

隴西蒼巘結巢高。本爲無人識翠毛。今日籠中強言語。乞歸天外啄含桃。

送人往長沙

荆門歸路指湖南。千里風帆興可諳。好聽鷓鴣啼雨處。木蘭舟晚泊春潭。

偶題

時事嬾言多忌諱。野吟無主若縱橫。君看三百篇章首。何處分明著姓名。

寄山中叟

青泉碧樹夏風涼。紫蕨紅粳午爨香。應笑晨持一盂苦。腥羶市裏叫家常。

贈琴客

曾攜五老峰前過。幾向雙松石上彈。此境此身誰更愛。掀天羯鼓滿長安。

勉吟僧

千途萬轍亂真源。白晝勞形夜斷魂。忍著袈裟把名紙。學他低折五侯門。

送人歸華下

蓮花峰翠溼凝秋。舊業園林在下頭。好束詩書且歸去。而今不愛事風流。

夏日城中作二首

三面僧隣一面牆。更無風路可吹涼。他年拾此歸何處。青壁紅霞裏石房。  
竹低莎淺雨濛濛。水檻幽窗署月中。有境牽懷人不會。東林門外翠橫空。

默坐

燈引飛蛾拂焰迷。露淋栖鶴壓枝低。冥心坐滿蒲團穩。夢到天台過剡溪。

水邊行

身著袈裟手杖藤。水邊行止不妨僧。禽棲日落獨孤立。隔浪秋山千萬層。

寄鄭谷郎中

人間近遇風騷匠。鳥外曾逢心印師。除此二門無別妙。水邊松下獨尋思。

翡翠

水邊飛去青難辨。竹裏歸來色一般。磨吻鷹鷂莫相害。白鷗鴻鶴滿沙灘。

與節供奉大德遊京口寺留題

柳岸晴緣十里來。水邊精舍絕塵埃。煮茶嘗摘興何極。直至殘陽未欲迴。

謝荆幕孫郎中見示樂府歌集二十八字

長吉才狂太白顛。二公文陣勢橫前。誰言後代無高手。奪得秦皇鞭鬼鞭。

謝陰符經勉送藏休上人二首

事遂鼎湖遺劍履。時來渭水擲魚竿。欲知賢聖存亡道。自向心機反覆看。  
一林霜雪未霑頭。爭遣藏休肯便休。學盡世間難學事。始堪隨處任虛舟。

幽齋偶作

幽院纔容箇小庭。疎篁低短不堪情。春來猶賴鄰僧樹。時引流鶯送好聲。

贈念法華經僧

萬境心隨一念平。紅芙蓉折愛河清。持經功力能如是。任駕白牛安穩行。

對菊

無豔無妖有香香。栽多不爲待重陽。莫嫌醒眼相看過。卻是真心愛淡黃。

閉門

正是閉門爭合閉。大家開處不須開。還防明月清風夜。有箇詩人訪得來。

勉送吳國三五新戒歸

法王遺制付仁王。難得難持劫數長。努力只須堅守護。三千八萬是垣牆。

夏日寄清溪道者

老病不能求藥餌。朝昏只是但焚燒。不知誰爲收灰骨。壘石栽松傍寺橋。

送惠空北遊

君向峴山遊聖境。我將何以記多才。叮嚀墮淚碑前過。寫取斯文寄我來。

寄懷歸州馬判官

三年爲倅興何長。歸計應多事少忙。又見秋風哀哀樹。滿山椒熟水雲看。

觀荷葉露珠

霏微曉露成珠顆。宛轉田田未有風。任器方圓性終在。不妨翻覆落池中。

苦熱懷玉泉寺寄仁上人

火雲如燒接蒼梧。原野煙連大澤枯。謾費葛衫葵扇力。爭禁泉石潤肌膚。

觀盆池白蓮

素萼金英歎露開。倚風凝立獨徘徊。應思瀲灩秋池底。更有歸天伴侶來。

折楊柳詞四首

鳳樓高映綠陰陰。凝重多含雨露深。莫謂一枝柔軟力。幾曾牽破別離心。  
館娃宮畔響廊前。依託吳王養翠煙。劍去國亡臺殿毀。卻隨紅樹噪秋蟬。  
穠低似中陶潛菊。軟極如傷宋玉風。多謝將軍遶營種。翠中閑早戰旗紅。  
高僧愛惜遮江寺。遊子傷殘露野橋。爭似著行垂上苑。碧桃紅杏樹搖搖。

答長沙丁秀才書

月月便車奔帝闕。年年貢士過荆臺。如何三度槐花落。未見故人攜卷來。

戒小師

不肯吟詩不聽經。禪宗懶岳懶遊行。他年白首當人間。將底言談對後生。

聞雁

瀟湘浦暖全迷鶴。邏遼川寒只有鷗。誰向孤舟憶兄弟。坐看連雁度橫橋。

送高麗二僧南遊

日邊鄉井別年深。中國靈蹤欲徧尋。何處碧山逢長老。分明認取祖師臨。

認猿皮

貴向獵師家買得。攜來乞與坐禪牀。不知摘月秋潭畔。曾對何人啼斷腸。

酬光上人

禪言難後到詩言。坐石心同立月魂。應記前秋會吟處。五更猶在老松根。

送僧歸日本

日東來向日西遊。一鉢閑尋徧九州。卻憶雞林本師寺。欲歸還待海風秋。

庚午歲十五夜對月

海澄空碧正團圓。吟想元宗此夜寒。玉兔有情應記得。西邊不見舊長安。

紅薔薇花

晴日當樓曉香歇。錦帶盤空欲成結。鶯聲漸老柳飛時。狂風吹落猩猩血。

貽九華上人

一法傳聞繼老能。九華閑臥最高層。秋鐘盡後殘陽暝。門掩松邊雨夜燈。

寄廖匡圖兄弟

僧外閑吟樂最清。年登八十喪南荆。風騷作者爲商確。道去碧雲爭幾程。

黃陵美人

寄紫蓋陽居士

落葉栖鴉掩廟扉。菟絲金縷舊羅衣。渡頭明月好攜手，獨可待郎郎不歸。

### 劉宅女子

幽怨詩

陸說後集。東南復州門街東。本劉氏舊宅。宇舍橫斷敝壞。鮮人居。梁太保震有遠房弟伯升秀才。請居之。既憩。馭月餘。晨夕甚安。一日晝寢。夢魘。久之乃寤。曰。適夢一女子泣而呼曰。聽妾幽怨之句云云。梁稱嘆而覺。全唐詩話上。

都安邑坊。陸氏宅。人常謂爲凶宅。有進士臧夏儼居其中。晝寢。忽夢魘。見一女子。

綠裙紅袖。弱質纖腰。如霧濛花。收淚而云。聽妾一篇幽恨之句。二說未知孰是。

卜得上峽日。秋江風浪多。巴陵一夜雨。腸斷木蘭歌。





全五代詩卷一百

北漢

李暉

暉字孟深。汴州陽武人。乾祐初進士。客遊嵐州。世祖劉旻即位。署州從事。擢知制誥翰林學士。歷仕睿宗父子。累官至推誠佐命功臣。特進守尚書左僕射兼中書侍郎平章事。上柱國。隴西郡開國公。入宋授行軍司馬卒。

十國春秋。暉文詞駢麗。見推流輩。英武帝時。天龍寺千佛樓成。詔暉撰碑銘。而命翰林令劉守清。王廷譽。勒文于石。一時無不嘆絕。其詞云云。

天龍寺千佛樓碑銘

覺皇遞興。大教垂世。成位有期。壞空相繼。大哉賢劫。千佛重光。六度萬行。軌躅相望。浩劫迢遙。一念可攝。勿謂難逢。聲塵相接。惟彼陶唐。宿列參墟。莓莓沃野。煌煌帝居。天啓亨會。神輸瑞圖。英武我后。后來其蘇。一人有作。撫寧邦域。治民事天。允釐庶績。金像玉樓。伊帝之力。懿哉坤維。永奠皇極。

譚用之

用之字藏用。五代末人。

十國春秋。北漢太原王景絕與用之爲友。以文章相砥礪。景絕于天會中自洛還家。見睿宗據太原。歎曰。天下將定。以區區一方拒天下。此危國也。遂止。上黨購四方書抄之。集書數千。

卷大率與用之皆高士也。文苑傳國初有顓贊、董淳、劉從義善文章。張翼譚用之善爲詩。張之翰善箋啓。贊淳略顯。餘皆官不達。吟窗雜錄用之有貽僧句云。流水物情諳世態。落花春夢壓塵芳。宿西溪隱士云。織檻錦紋苔乍結。墮書花印菊初殘。皆佳句也。

塞上

秋風漢北雁飛天。單騎那堪遶賀蘭。磧暗更無巖樹影。沙平時有野燒瘢。貂披寒色和衣冷。劍佩胡霜隔匣寒。早晚橫戈似飛尉。擁旄深入異田單。  
鉢略城邊日欲西。遊人卻憶舊山歸。牛羊集水煙黏步。鷓鴣盤空雪滿圍。獵騎靜逢邊氣薄。戍樓寒對暮煙微。橫行總是男兒事。早晚重來似漢飛。

贈索處士

不將桂子種諸天。長得尋君水石邊。元豹夜寒和霧隱。驪龍春暖抱珠眠。山中宰相陶宏景。洞裏真人葛稚川。一度相思一惆悵。水寒煙澹落花前。

別維下知己

金鼎光輝照雪袍。維陽春夢憶波濤。塵埃滿眼人情異。風雨前程馬足勞。接塞峨眉通蜀險。過山仙掌倚秦高。別來無限幽求子。應笑區區味六韜。

約張處士遊梁

莫學區區老一經。夷門關吏舊書生。晉朝滅後無中散。韓國亡來絕上卿。龍變洞中千谷冷。劍橫天外八風清。好攜長策干時去。免逐漁樵庶太平。

送友人歸青社

鷓鴣途程在碧天。綠衣東去復何言。三千賓客舊知己。十二山河新故園。吟看桂生溪上月。醉聽鯤化海濤翻。好期聖代重相見。莫學袁生老竹軒。

送丁道士歸南中

孤雲無定鶴辭巢。自負樵桐不說勞。服藥幾年期碧落。驗符何處呪丹毫。子陵山曉紅雲密。青草湖平雪浪高。從此人稀見蹤跡。還應選地種仙桃。

月夜懷寄友人

劍氣徒勞望斗牛。故人別後阻仙舟。殘春謾道深傾蓋。好月那堪獨上樓。何處是非隨馬足。由來得喪白人頭。清風未許重攜手。幾度高吟寄水流。

憶南中

碧江頭與白雲門。別後秋霜點鬢根。長記學禪青石寺。最思共醉落花村。林間竹有湘妃淚。窗外禽多杜宇魂。未棹扁舟重回首。采薇收橘不堪論。

寄友人

病多慵引架書看。官職無才思已闌。穴鳳瑞時來卻易。人龍別後見何難。琴樽風月閑生計。金玉松筠舊歲寒。早晚煙村碧江畔。挂書重對蓼花難。

寄岐山林逢吉明府

岐山高與隴山連。製錦無私服晏眠。鸚鵡語中分百里。鳳凰聲裏過三年。秦無舊俗雲煙媚。周有遺風父老賢。莫役生靈種楊柳。一枝枝折灞橋邊。

感懷呈所知

十年流落賦歸鴻。誰傍昏衢駕燭龍。竹屋亂煙思梓澤。酒家疎雨夢臨邛。千年別恨調琴懶。一片年光覽鏡慵。早晚休歌白石爛。放教歸去臥羣峰。

江上聞笛

誰爲梅花怨未平。一聲高喚百龍驚。風當閭闔庭初靜。月在姑蘇秋正明。曲盡綠楊涵野渡。管吹青玉動江城。臨流不欲殷勤聽。芳草王孫舊有情。

寄閩記室

織錦歌成下翠微。豈勞西去問樅機。未開水府珠先見。不掘豐城劍自輝。鼉逐玉蟾攀桂上。馬隨青帝踏花歸。相逢半是雲霄客。應笑歌牛一布衣。

幽居寄李祕書

幾年帝里阻煙波。敢向明時叩角歌。看盡好花春臥穩。醉殘紅日夜吟多。印開夕照垂楊柳。畫破寒潭老芰荷。昨夜前溪有龍鬪。石橋風雨少人過。

貽釣魚李處士

罷吟鸚鵡草芊芊。又泛鴛鴦水上天。一棹冷涵楊柳雨。片帆香挂芰荷煙。綠搖江澹萍離岸。紅點雲疎橘滿川。何處邈將歸畫府。數莖紅蓼一漁船。

河橋樓賦得羣公夜讌

芙蓉簾幕扇秋紅。蠻府新郎夜讌同。滿座馬融吹笛月。一樓張翰過江風。杯黏紫酒金螺重。談轉瑤璫玉塵空。深荷良宵慰顛顛。德星池館在江東。

寄左先輩

狂歌白鹿上青天。何似蘭塘釣紫煙。萬卷祖龍坑外物。一泓孫楚耳中泉。翩翹蠻榼薰晴浦。轂轆魚車響夜船。學取青蓮李居士。一生杯酒在神仙。

秋日圃田送人隨計

僕射陂前是傳郵。去程鷓鴣弄高秋。吟拋芍藥裁詩圃。醉下茱萸飲酒樓。向日迴龍駒皎皎。臨風誰和鹿呦呦。明年二月仙山下。莫遣桃花逐水流。

途次宿友人別墅

十里嶠函一夢勞。豈知雲館共蕭條。半簾綠透侵寒竹。一榻紅侵墜晚桃。蠻酒客稀知價長。蜀琴風定覺聲高。感君巖下閑招隱。細鏤金盤鱸錯刀。

春日期巢湖舊事

暖掠紅香燕燕飛。五雲仙佩曉相攜。花開鸚鵡韋郎曲。竹亞虬龍白帝溪。富貴萬場歸紫酒。是非千載逐芳泥。不知多少開元事。露泣春叢向日低。

再遊韋曲山寺

鵲巖煙斷玉巢欹。罨畫春塘太白低。馬踏翠開垂柳寺。人耕紅破落花溪。千年勝概咸原上。幾代荒涼繡嶺西。碧吐紅芳舊行處。豈堪回首草萋萋。

寄徐拾遺

長竿一擊白龍吟。誰和騶虞發素琴。野客碧雲魂易斷。故人芳草夢難尋。天從補後星辰穩。海自潮來島嶼深。好向明庭拾遺事。莫教元豹老泉林。

秋宿湘江遇雨

江上陰雲鎖夢魂。江邊深夜舞劉琨。秋風萬里芙蓉國。暮雨千家薜荔村。鄉思不堪悲橘柚。旅遊誰肯重王孫。漁人相見不相問。長笛一聲歸島門。

貽南康陳處士陶

白玉堆邊蔣逕橫。空涵二十四灘聲。老無征戰軒轅國。貧有茅茨帝舜城。丹鳳晝飛羣木冷。一龍秋臥九江清。時人莫笑非經濟。還待中原致太平。

渭城春晚

秦樹朦朧春色微。香風煙煖樹依依。邊城夜靜月初上。芳草路長人未歸。折柳且堪吟晚檻。弄花何處醉殘暉。釣鄉千里斷消息。滿目碧雲空自飛。

閑居寄陳山人

閑居何處得閑名。坐掩衡茅損性靈。破夢曉鐘聞竹寺。沁心秋雨浸莎庭。甕邊難負千杯綠。海上終眠萬仞青。珍重先生全太古。應看名利似浮萍。

江邊秋夕

千鍾紫酒薦菖蒲。松島蘭舟漱澹居。曲內橘香江客笛。字中嵐氣岳僧書。吟期汗漫驅金虎。坐約丹青跨玉魚。七色花虬一聲鶴。幾時乘興上清虛。

江館秋夕

耿耿銀河鷹半橫。夢欵金碧轆轤輕。滿窗謝練江風白。一枕齊紈海月明。楊柳敗梢飛葉響。芰荷香柄折秋鳴。誰人更唱陽關曲。牢落烟霞夢不成。

秋夜同友人話舊

露下銀河雁度頻。囊中爐火幾時真。數莖白髮生浮世。一盞寒燈共故人。雲外簾涼吟嶠月。島邊花暖釣江春。何當歸去重攜手。依舊紅霞作近隣。

古劍

鑄時天匠待英豪。紫焰寒星匣倍牢。三尺何年拂塵土。四溟今日絕波濤。雄應垓下收蛇陣。滯想溪頭伴豹韜。惜是真龍懶拋擲。夜來衝斗氣何高。

寄王侍御

烏盡弓藏良可哀。誰知歸釣子陵臺。鍊多不信黃花耗。吟苦須驚白髮催。喘月吳牛知夜至。嘶風胡馬識秋來。燕歌別後休惆悵。黍已成畦菊已開。

別江上一二友生

國風千載務重華。須逐浮雲背若耶。無地可歸堪種玉。有天教上且乘槎。白綸巾卸蘇門月。紅錦衣裁御苑花。他日成都卻回首。東山看取謝鯤家。

寄孟進士

依舊池邊草色芳。故人何處憶山陽。書回科斗江帆暮。曲罷騶虞海樹蒼。吟望曉烟思桂渚。醉依殘月夢餘杭。別來南國知誰在。空對襜褕一斷腸。

寄許下前管記王侍御



昔年南去得娛賓。頓遜杯前共好春。蠟泛羽觴蠻酒膩。鳳銜瑤句蜀牋新。花憐遊騎紅隨轡。草戀征車碧  
遶輪。別後青青鄭南陌。不知風月屬何人。

荆浩

浩字浩然。沁水人。隱太行洪谷。自號洪谷子。工丹青。尤長山水。

清河書畫舫。河內荆浩。博雅好古。善畫山水。值五季多故。隱於太行。著山

水訣

行世。

畫山水圖答大愚

恣意縱橫掃。峯巒次第成。筆尖寒樹瘦。黑澹野雲輕。巖石噴泉窄。山根到水平。禪房時一展。兼稱苦空情。

大愚

大愚鄴都青蓮寺沙門。

乞荆浩畫

六幅固牢健。知君恣筆蹤。不求千澗水。止要兩株松。樹下留盤石。天邊縱遠峯。近巖幽溼處。惟藉墨烟濃。

太原妓

妓太原人。

全唐詩話。五代時。湖南歐陽詹遊太原。悅一妓。約至都。相迎。別後。妓思之。疾甚。乃刀髻。作詩寄詹。絕筆而逝。

寄歐陽詹

自從別後減容光。半是思郎半恨郎。  
欲識舊來雲髻樣。爲奴開取鏤金箱。

全五代詩補遺

梁

無名氏

瘞筆磚文

清異錄趙光逢薄游襄清濯足溪上見一方磚類碑上題字云云下又有獨孤貞節立四字甄後積土如益微有苔蘚蓋好事者瘞筆所在

秃友退鋒郎功成髣髮傷冢頭封馬鬣不敢負恩光

唐

楊凝式

凝式爵里詳見卷九中

上張相詩

洛陽縉紳舊聞記石晉時張相從恩自南院宣徽使官才檢校司徒權西京留守到洛城後未久少師自東京得假往洛陽數日寄詩上張相云云張公知其貪贈遺甚厚

南院司徒鎮洛京未經三月政聲成四方羣后皆如此端坐庸夫見太平

游士藻

句

清異錄游士藻為晉王記室予過其居知昨夜命客問食品曰第一云云予曰好改作釘字便是一句詩士藻令取夜來食日對面塗注云吾平生以順人情為佛事獨違學士可乎

虛釘玲瓏石鎮羊。

張振祖

句

清異錄沙門愛英注池陽村示人之語曰萬論千經不如無念無營時郡娼滿堂娘多姿而富情真妓女中麟鳳進士張振祖以無念無營有情有色製一聯云云

門前草滿無無老床底錢多有有娘。

晉

鄭遨

遨爵里詳見卷十二中。

語

清異錄鄭遨隱居有高士問何以閱日對曰云云謂玩鷗而聽蛙也

不注目於婆婆兒即側耳於鼓吹長。

漢

陶晟

晟虢州人漢高祖即位以勸進功授虢州刺史罷郡由環衛出為蕃方副車軍司馬終於荊州

副使知州事有集

洛陽籍紳舊聞記公能詩與宮師王相溥善常有詩往來屬和翰林承旨陶公毅叔事之自前延安軍司馬授華州行軍陶翰林為序親書以送之送從叔赴華下序略曰聖上即位之三年命前

延安軍司馬參戎。闡於華下。綏舊俗也。踐華寧秦之境。遠皇猷者。五十有九年矣。赤驥嘶風。而可仰玉蟾。耀彩以如晝。潛編嘉作。別俟知音。攀琪樹而笑。天風鼎遷。周頌控文。鱗而飛赤水。幅裂韓詩。辭多不載。公晚年知進士。張翼能詩。召置門下。厚待之。嘗曰。七言詩。我不如翼。五言詩。翼不如我。公有詩云云。又在環衛時詩云云。

句

河經蕃地濁。山到漢家青。擬拋丹禁去。試著白衣看。

仙書

酒家門額

清異錄。唐末馮翊城外。酒家門額書云云。於王字末。大書酒也。字體散逸。非世俗書人。謂是呂洞賓題。

飛空卻回顧。謝此含春王。

周

妙玉

杜鵑句

清異錄。太府少卿。潘崇有。處女名妙玉。詠杜鵑云云。

一九苞奴般。毛羽淵明鬼。

無名子

嘲曹翰

清異錄曹翰事世宗為樞密承旨性貪侈常著錦織金線絲襪朝士有托無名子嘲之者詩曰

不作錦衣裳裁為十指倉千金包汗腳漸愧絡絲娘

紫相公

詩

清異錄進士于則謁外親於阡陽未至十餘里飯于野店旁有紫荆樹村民祠以為神呼曰紫相公則烹茶因以一盃置相公前策馬徑去是夜夢峨冠紫衣人來見自陳余則紫相公主一方菜蔬之屬隸有天平吏掌豐辣判官主儉然皆嗜茶而奉祠者鮮以為品為供蚤蒙厚飲可謂非常之惠因口占贈詩云云蓋則是日以小分鬚銀匙打茶故目為攪銀公子則家業蔬圃中祠之年年獲收

降酒先生風韻高攪銀公子更清豪碎牙粉骨功成後小碾當銜馬腳槽

陶爨

茶詩

清異錄獨子爨年十二歲予讀胡嶠茶詩愛其新奇因令做法之近晚成篇有云

生涼好喚雞蘇佛回味宜稱橄欖仙

李度

度顯德中舉進士

玉壺清話工詩有句云云人多誦之王朴為樞密止以此一聯于申文炳知舉遂擢為第三人嘲曰主司只誦一聯詩

句

醉輕浮世事老重故鄉人。

### 雲陽道觀廢壇古籤

#### 籤詞

玉壺清話。盧多遜相生曹南方。幼其父攜就雲陽觀小學。與羣兒詞書。廢壇上有古籤一筒。競往抽取。為戲時。多遜尙未識字。得一籤。歸示其父。詞云云。父見頗喜。以為吉籤。迨後作相。及敗。因遣堂吏趙白陰。與秦王廷美。連謀南竄。年五

十二卒一

字不差。

身出中書堂。須因天水白。登仙五十二。終為蓬海客。

## 南唐

### 李善寧子

#### 咏貧家壁

清異錄。臨川李善寧之子。十歲能卽席賦詩。親友嘗以貧家壁試之。略不構思。吟曰。拖涎指蝸牛也。

椒氣從何得。燈光鑿處分。拖涎來藻飾。唯有篆愁君。

#### 嘲

清異錄。陳喬張秘之子。秋晚並游玄武湖。時羣鴨游泛。秘子曰。一軸內本瀟湘。喬子俄顧卒吏云。此白色水禽。可作脯否。僉議云。喬子從是得陳一堆。白鷗脯之名。

張秘子。半莖鳳毛。陳喬男。一堆牛屎。

#### 古詩

釣磯立談。史虛白論。宋子嵩引古詩云云。

當路莫栽荆棘樹。他時免掛子孫衣。

### 後蜀

#### 蜀中道人

句

清異錄。蜀中有一道人。賣自然羹。人試買之。盃中二魚。鱗鬣腸胃皆在。鱗上有黑紋。如一圓月。汁如淡水。食者旋別去鱗腸。其味香美。有問魚上何故有月。道人從盃中傾出。皆是荔枝。人初未嘗有魚并汁。笑而急走。回顧云云。明年時疫。食羹人皆免。道人不復再見。

蓬萊月。也不識。

### 楚

#### 賣藥道人

無字歌

清異錄。長沙獄掾任福祖。擁騶吏出行。有賣藥道人行吟。無字歌。福祖審思。豈非異人。急遣訪求。已出城矣。其歌曰。

無字歌。呵呵亦呵呵。哀哀亦呵呵。不似荷葉參軍子。人人與箇拜。口木大作廳上假閻羅。

### 閩

#### 滑稽子

詩

清異錄。閩士赴科。臨川人赴調。會京師旗亭。各舉鄉產。閩士曰。我土荔子真壓枝。天子釘坐。真人天下。安有並駕者。撫人不識荔枝之未腊者。故盛主楊柳。閩士不忿。遂成喧競。旁有滑稽子。徐爲一絕云云。



閩香玉女含香雪。吳會星郎駕火雲。草木無情爭底事。青明經對赤參軍。

## 北漢

### 趙節

爐火詩

清異錄。蒲中趙節。博瞻剛直。鄉人敬之。嘗作爐火詩云。

近冬附火爲秦火。透春擁爐成否爐。用否隨時有輕重。進身君子合知無。

